


HC  
430  
F3L8  
v.1









乾隆五年閏六月十四日奉

旨開列經理諸臣銜名

監理

和

碩

和

親

王臣弘

晝

總閱

經筵講官太保議政大臣保和殿大學士總理兵部事務世襲三等伯臣鄂爾泰

經筵講官起居注太保和殿大學士兼管吏部尚書翰林院掌院學士襲三等伯臣張廷玉

經筵講官太子太保東閣大學士兼禮部尚書臣徐本

南書房校對



吏部右侍郎世襲一等輕車都尉臣蔣溥

經筵講官戶部右侍郎臣梁詩正

內閣學士兼禮部侍郎臣汪由敦

日講官起居注詹事府詹事臣鄂容安

日講官起居注翰林院侍讀學士世襲三等伯臣張若靄

日講官起居注翰林院侍讀臣彭啟豐

日講官起居注翰林院侍講臣介福

翰林院修撰臣金德瑛

翰林院編修臣秦蕙田



翰林院修撰臣莊有恭

武英殿校對

經筵講官刑部右侍郎臣張照

工部右侍郎臣許希孔

原任刑部左侍郎臣勵宗萬

日講官起居注詹事府詹事兼翰林院侍讀學士臣陳浩

日講官起居注詹事府少詹事兼翰林院侍講學士臣呂熾

日講官起居注詹事府少詹事兼翰林院侍講學士臣周學健

署日講官起居注右春坊右中允兼翰林院編修臣朱良裘



翰

林

院

編

修臣田志勤

翰

林

院

編

修臣董邦達

翰

林

院

檢

討臣唐進賢

翰

林

院

編

修臣李清芳

翰

林

院

檢

討臣郭肇鏞

校刊

拔

貢

生臣費應泰

拔

貢

生臣盧明楷

拔

貢

生臣薛世楫



拔

貢

生臣廖名揚

拔

貢

生臣徐顯烈

拔

貢

生臣王積光

優

貢

生臣王男

恩

貢

生臣曾尙渭

拔

貢

生臣李長發

拔

貢

生臣程无林

監造

內務府南苑郎中兼佐領加六級紀錄八次臣雅爾岱



內務府錢糧衙門郎中兼佐領加五級紀錄六次臣永保

內務府廣儲司員外郎加二級臣雙玉

內務府慶豐司員外郎加一級紀錄二次臣西寧

內務府廣儲司司庫加二級臣胡三格

監造臣恩克

監造加一級臣永忠

庫掌臣于保柱

庫掌臣鄭桑格

庫掌臣姚文彬



吏科給事中臣倪國璉謹

奏爲進

呈書籍事仰惟我

皇上軫念民瘼仁恩周浹遇各省偶有歉收隨即多方補救蠲賑備施不惜

宵旰之勤勞以謀斯民之安飽然猶

聖不自聖安益求安旱澇未形疇咨早切視民如傷之懷有加無已建極錫福之道曲成不遺凡屬內外大小臣工孰不思罄竭愚忱以仰佐



聖治於萬一者

臣

忝居言職輪該進書因見同鄉已故錢

塘縣監生

臣

陸曾禹所集救饑譜一書未經刊刻其

書每條前列經史後加論說與今所進經史之體無異是以不揣愚昧錄其大要共爲四卷恭呈

睿覽雖書中所列條目總不出

聖政之範圍然其編輯詳明似尚有可取者伏惟

聖慈垂鑒俯採芻蕘之一得宥其草野之蠢愚

臣

曷勝惶

悚待

命之至謹



奏乾隆四年十月二十日奉

上諭吏科給事中倪國璉奏進救饑譜四卷猶有鄭俠繪  
圖入告之遺意甚屬可嘉著南書房翰林詳加校對畧  
爲刪潤命名曰康濟錄交與武英殿刊刻頒發倪國璉  
著賞賜表裏各二疋以示獎予欽此



金定局海金



—  
—



山東巡撫臣朱定元謹

奏爲恭謝

天恩事乾隆五年九月十六日提塘官李志健賫捧

欽頒

欽定康濟錄全部到

臣臣

恭迎至署敬設香案望

闕叩頭祇領訖欽惟我

皇上

堯仁廣被

舜澤覃敷



至德發爲文章

訐謨歸於典則風行渙汗皆天地之性情雨沛絲綸悉  
知仁之流見固已煌煌著述玉振金聲秩秩縑緗珠  
聯璧合矣乃

聖不自聖安愈求安翕受敷施每靡臣隣之咨傲亮工熙  
績不遺獻納於芻蕘爰以科臣之陳書

特諭詞垣而校正旣荷

宸覽復

錫嘉名刪潤成編鐫鏤竣事養民善政不出



一人之範圍因時制宜實爲百爾之觀法仰邀

恩命式賚臣工臣恬養無能撫綏有志獲奉

琅函之賜頓開茅塞之愚敢不尋繹回環朝夕遵爲矩  
矱謹當梨棗廣布遠近脩厥典型群知人事之修聿  
懋阜成之績飲和食德咸沐

恤灾悍患之慈履厚戴

高共仰

執兩用中之盛所有感激微忱理合恭疏

奏謝



天恩伏祈

皇上睿鑒施行謹

奏



欽定康濟錄總目

第一卷

前代救援之典

第二卷

先事之政 目六

一教農桑以免凍餒  
三建社倉以便賑貸  
五奏截留以資急用

二講水利以備旱澇  
四嚴保甲以革姦頑  
六稽常平以杜侵欺

第三卷

臨事之政 目二十

第四卷

事後之政 目六

一急祈禱以回天意  
二求才能以捍災傷  
三命條陳以開言路  
四先審戶以防冒恩  
五借國帑以廣糴糶  
六理囚繫以釋含冤  
七禁遏糴以除不義  
八發積儲以救困窮  
九不抑價以招商運  
十開粥廠以活垂危  
十一安流民以免顛沛  
十二勸富豪以助濟施  
十三乞蠲賑以紓群黎  
十四興工作以食餓夫  
十五育嬰兒以慈孤幼  
十六視存亡以惠急需  
十七弭盜賊以息奸宄  
十八甘專擅以奮救援  
十九撲蝗蝻以保稼穡  
二十貸牛種以急耕耘

一贖難賣以全骨肉  
二憐初泰以大撫綏  
三必賞罰以風繼起  
四籌匱乏以防薦饑  
五尚節儉以裕衣食  
六敦風俗以享太平



附錄

摘要備觀  
社倉條約

賑粥須知

捕蝗必覽

金定辰源金

糸目



欽定康濟錄卷之一

前代救援之典

**總敘**聖賢之治天下。豈不欲斯民含哺鼓腹。日遊于太和之世哉。無如水旱之災。堯湯不免。使無良策以處之。致民有饑餒之憂。流離之患。如保之懷。肯恝然乎。於是以不忍人之心。行不忍人之政。荒政從之而出矣。是政也。非譜而何。夫古有治譜。欲其前後相師。以修其政令。何獨至于救饑而不以前人爲譜哉。爰集聖賢之言行。已昭救濟之謀猷者。或總列於前。或分陳於後。果能倣而行之。惠我元元。

如登大有。是譜也。不猶有脚之陽春。力可回天者耶。常目在焉。蒼生幸矣。

**唐**堯之爲君也。存心於天下。加志於窮民。一民饑。曰我饑之也。一民寒。曰我寒之也。一民有罪。曰我陷之也。百姓戴之如日月。親之如父母。

**謹案**

三稱我字。是聖人以全副精神注之。一肩任來之

意。四海雖大。若以我之爲君。有一民爲饑寒所困。而陷於法網者。非我之教養有虧歟。故朝乾夕惕。澤潤生民。舉天地間。盡在春風和氣中也。



虞舜彈五絃之琴。歌曰。南風之薰兮。可以解吾民之愠兮。南風之時兮。可以阜吾民之財兮。

**謹案**大舜認定民是吾之民。愠必爲之解。財必爲之阜。方遂其惠養元元之意。肯令凶年饑歲。流離失所。而不急爲軫恤哉。

**商**湯因旱。禱於桑林。以六事自責。曰。政不節歟。民失職歟。宮室崇歟。婦謁盛歟。苞苴行歟。讒夫昌歟。何以不雨而至斯極也。言未已。大雨方數千里。

**謹案**湯在位三十祀。而遇大旱之年。共有七。民無菜色。

者。要非無備而能然也。禱之尚如是之切。上蒼有不爲之感動哉。是六事之責不可少。而九年之蓄尤不可缺也。

**周**武王立重泉之戍。令曰。民有百鼓之粟者不行。民舉所最粟以避重泉之戍。而國穀二十倍。最聚也。

**謹案**穀不積。不足以救饑。令不嚴。不足以懼民。嚴令積穀。聖王權變之道也。卽豫備不虞之典也。尚父不云乎。敬勝怠者吉。怠勝敬者凶。安不忘危。敬勝之事也。故雖禾黍油油。必令倉箱盈足。誠以豐年多蓄。則饑饉可無。



虞耳。

周公曰。嗚呼。君子所其無逸。先知稼穡之艱難。乃逸。則知小人之依。

註云。魚無水則死。木無土則枯。民非稼穡則無以生也。四民之事。莫勞於稼穡。生民之功。莫盛於稼穡。周公發無逸之訓。以戒成王。懼其知逸而不知無逸也。豈獨成王之所當知哉。實千萬世人主之準則也。

孔子自魯適齊。時齊旱饑。景公問曰。如之何。對曰。凶年力役不興。馳道不修。所以玉帛祀以下牲。此賢君自貶以救

民之禮也。

**謹案**時當饑饉。若不節一人之用度。救萬姓之流離。天命民晷之際。豈不大可畏耶。故夫子以此告之。使景公急以救民爲事也。

易經益卦象曰。益損上益下。民說无疆。自上下下。其道大光。

大全云。恩由上究。非僅一切轉移之術。始爲益之名者也。要在制民常產之外。若山林川澤之利。損以與民。貸稅田租之類。量加蠲免。如是益下。而民有不欣欣然盡



發愛戴之心者歟。

書經帝曰。棄黎民阻饑。汝后稷播時百穀。

**謹案**。舜之民。曷嘗阻於饑哉。然舜以黎民非百穀不能生其身。非后稷莫能教其耕。故必諄諄戒勉。益見聖主賢臣。安不忘危。豫備不虞之意耳。

詩經大雅。倬彼雲漢。昭回于天。王曰於乎。何辜今之人。天降喪亂。饑饉薦臻。靡神不舉。靡愛斯牲。圭璧既卒。寧莫我聽。又曰。靡人不周。無不能止。

**困**。董煟曰。靡神不舉。靡愛斯牲。說謂慰安人心。然山川

禱祀。從古有之。亦見古人憂畏之切。至七章言靡人不周。無不能止。非當時有實惠及于民。安能如是。

春秋魯僖公二年冬十月不雨。三年春王正月不雨。夏四月不雨。僖公憂閔。元服避舍。躬節儉。紬女謁。輟樂休工。釋更徭之逋。罷軍寇之誅。去苛刻慘毒之政。所蠲浮令四十五事。放讒佞郭都之等十三人。誅領人之吏。受貨賂趙侃等九人。率羣臣禱于山川。天卽爲之大雨。

**謹案**天以水旱困人。正欲長民者之惠愛蒼生耳。苟能遇災而懼。恤民之瘼。更新善政。天將消其災而錫之福。



矣。從古天人相感之理。如響應聲。夫豈獨僖公一事哉。  
禮記王制云。國無九年之蓄。曰不足。無六年之蓄。曰急。無  
三年之蓄。曰國非其國也。三年耕。必有一年之食。九年耕  
必有三年之食。以三十年之通制國用。雖有凶旱水溢。民  
無菜色。然後天子食。曰舉以樂。

**謹案**無三年之蓄。尚非其國。後之各省。其所蓄不知有  
幾。隋唐行之而有效。紫陽施之而見功者。社倉也。庶幾  
乎其得之歟。夫粟既積之於京師。復徧之於天下。倉箱  
足而積貯豐。小民將擊壤而歌矣。聖人所以能樂民之

樂也。

周禮大司徒以荒政十二聚萬民。一曰散財。貸種食也。二曰薄

征。輕賦稅也。三曰緩刑。省刑罰也。四曰弛力。息徭役也。五曰舍禁。山澤無禁也。

六曰去幾。去關防之幾察。七曰眚禮。殺吉禮也。八曰殺哀。節凶禮也。

九曰蕃樂。謂閉藏樂器而不作。十曰多昏。多昏配則男

神。求廢祀而修之也。十二曰除盜賊。安良民也。大司徒以保息六養萬

民。一曰慈幼。二曰養老。三曰振窮。四曰恤貧。五曰寬疾。六

曰安富。

謹案語云三代而上有荒歲而無荒民。其所以無荒民



者。必上之人有以豫備故也。卽富者尚欲安之。况老幼貧窮疾病之類。有不在其懷保之中耶。嗟夫。政之不可偏廢。如人身之脉絡。不可一經不治。致令其受病也。世之爲政者。果能視此而無愧焉。康阜之休。旁敷四海矣。穀梁傳。一穀不升謂之嗛。二穀不升謂之饑。三穀不升謂之饉。四穀不升謂之荒。五穀不升謂之大祲。大祲之禮。君食不兼味。臺榭不塗。弛侯廷道不除。百官布而不制。鬼神禱而不祀。嗛同歉。不滿之意也。

**明** 邱濬曰。君食不兼味以下。卽周禮膳夫所謂大荒則

不舉者也。譬如父母焉。其子不哺而已。乃日餘膏粱。于心安乎。

**齊糴賤**。桓公恐五穀之歸於諸侯。欲爲百姓藏之。問於管子。管子曰。今者夷吾過市。有新成囷京者二家。君請式璧而聘之。桓公從之。民爭爲囷京以藏穀。

**謹案**。桓公之慮固深。管子之智更美。倘不賞一二人以風衆人。其誰我從。此所謂藏富于民。而君不致獨貧者也。曷嘗盡歛于太倉之內哉。夫國無三年之蓄者。國非其國。然則交相致益。而後富強可甲于天下。



周惠王十七年十二月衛文公立。公大布之衣。大帛之冠。務材訓農。通商惠工。敬教勸學。授方任能。元年革車三十乘。季年乃三百乘。

**謹案**治國不可以縱欲。守位貴從乎民好。膺民社者。治本是圖。躬行節儉。則恩膏沛于萬姓。菽粟足于倉箱矣。懿公好鶴。而文公能勤民布政。不數年間。國以富厚。民用和輯。人主好惡之間。不可不慎也如此。

周敬王四十年夏五月。熒惑守心。宿名。心。宋之分野也。景公憂之。司星子韋曰。可移于相。公曰。相。吾之股肱。曰。可移于

民公曰。君者待民。曰。可移于歲。公曰。歲饑民困。吾誰爲君。子韋曰。天高聽卑。君有君人之言三。熒惑宜有動。於是候之。果徙三度。

**謹案**觀景公之言。蓋不專爲一身而憂之矣。相是股肱。民爲邦本。此數語。何嘗有意格天。而天則爲之格矣。可見天人感應之理。原在乎呼吸間。子韋知其理而候之。果徙三度。仁哉景公。智哉子韋也。

**魏**文侯時。租賦增倍于常。或有賀者。文侯曰。今戶口不加。而租賦歲倍。此由課多也。譬如治焉。令大則薄。令小則厚。



治人亦如之。夫貪其賦稅。不愛民人。是虞人反裘而負薪也。徒惜其毛。不知皮盡。而毛安所附。是兩匱之勢也。

**謹案**理勢明則言辭達。文侯之論增賦。不事支流旁幹。直能探本窮源。賀者應慚。僞者宜懼。君子知此。民困必蘇。非社稷之福哉。

李悝爲魏文侯作平糴法。曰糴甚貴則傷民。甚賤則傷農。若民傷則離散。農傷則國貧。故甚貴與甚賤。其傷一也。善爲國者。使民無傷。而農益勸。故大熟則上糴三而舍一。中熟糴二。下熟糴一。使民適足。價平而止。小饑則發小熟之

斂中饑。則發中熟之斂。大饑。則發大熟之斂。以糶于民。故雖遇水旱饑饉。糶不貴而民不散。行之魏國。日益富強。

**謹案**收糶于豐熟之時。出糶于荒歉之日。務必平價而止。民農皆不令傷。非法之出于萬全耶。有何水旱之足慮。嘉謀若此。食祿何慚。在位者鑒此類推。廣其仁術。不負敦本愛民之君子矣。

**漢**文帝二年詔曰。方春時和。草木羣生之物。皆有以自樂。而吾百姓鰥寡孤獨困窮之人。或阡于危亡而莫之省憂。爲民父母將何如。其議所以賑貸之。



**謹案**文帝以草木羣生之樂其樂。因念吾民窮困之顛連。廣其仁術。賑貸並行。是陽春之所不及者。文帝得而及之矣。否則枯木有時暢茂。窮簷赤子。樂歲終身苦。是草木之弗若。不亦深可歎乎。撫黎元者。能觸景念民。勿忘先王對時育物之懷。則太和元氣。長流行于宇宙中矣。

文帝癸酉十二年。晁錯上言曰。夫人情一日不再食則饑。終歲不製衣則寒。夫腹饑不得食。膚寒不得衣。雖慈父不能保其子。君安能以有其民哉。是故明君貴五穀而賤金。

王方今之務。莫若使民務農而已。欲民務農。在于貴粟。貴粟之道。在于使民以粟爲賞罰。今募天下之人。入粟于邊。以受爵免罪。不過三歲。塞下之粟必多矣。帝從之。令民入粟于邊。拜爵各以多少級數爲差。

**謹案**自古以民饑而擾天下者。不一而足。未聞無珠玉而擾其國者也。錯勸其君。賤珠玉。寶五穀。足國之本務。其在是乎。所以稱智囊也。

景帝後元二年。夏四月。詔曰。雕文刻鏤。傷農事者也。錦繡纂組。害女工者也。農事傷。則饑之本。女工害。則寒之原也。



夫饑寒並至。而能亡爲非者寡矣。今歲或不登。民食頗寡。其咎安在。或詐僞爲吏。吏以貨賂爲市。漁奪百姓。侵牟萬民。其令二千石。各修其職事。有官職耗亂者。丞相以聞。請其罪。

**謹案**此詔專重農桑。委其責于太守。致治之方。莫若此矣。况又令丞相不時奏聞。此大法小廉。民安物阜。周之成康。漢之文景。皆以賢君稱也。

武帝時。董仲舒對策曰。郡守縣令。民之師帥。所以承流而宣化也。師帥不賢。則主德不宣。恩澤不流。是以陰陽錯繆。

氛氣充塞羣生寡遂黎民未濟也。

**謹案**仲舒以承流宣化責成郡守縣令此真握要之言。

大吏貴而不切散官疎而無權惟府縣官有守土之專政令聲教易與相通末俗頽風力能振作劉向素稱董仲舒有王佐之才者以其論事切中機要而立意本于正大也。

武帝征和四年四月以趙過爲搜粟都尉過教民爲代田。

一畝三畎。

畎者田中之溝也。廣一尺深一尺。

歲代處。

代易也。歲易其處。

故曰代田。

每耨輒附根根深耐風與旱其耕耘田器皆有便巧用力



少而得穀多民皆便之。

**謹案**詩云。誕后稷之穡。有相之道。從古教稼任地。各有便宜。以盡輔相裁成之責。武帝爲民治農事。必使良才賢牧。講求于隴畝之間。以人工代天巧。神明變化。總期便民。而不敢逸于圖治。休哉盛業。其漢治之隆歟。

光武帝建武二十五年冬十月。監軍謁者宋均。見蠻方飢餓困厄。均與諸將議曰。夫忠臣出境。有可以安國家者。專之可也。乃矯制告諭羣蠻而降之。蠻地遂平。均未至。先自効矯制之罪。上嘉其功。迎賜以金帛。

**謹案**天災可畏。飢徧蠻方。設或再加困鬪。血刃者固多。僵仆者要亦不少。豈好生之心哉。監軍矯制而諭之降。既得上國之體。且服小醜之心。以仁布德。以智全仁。宜乎上之獎賞矣。後之銜命闡外者。其將以此爲法乎。

明帝永平三年。大起北宮。時天大旱。尚書僕射鍾離意謁闕免冠上疏曰。昔成湯遭旱。以六事自責。切見北宮大作。民失農時。自古非苦宮室小狹。但患民不安寧。宜且罷止。以應天心。上卽時罷之。遂應時澍雨。

**謹案**蒼蒼者天耶。孰謂理居元渺。一時無以格之哉。當



時勞民傷財。人心不安。而天意示警。僕射免冠切諫。上卽罷役。時雨降而禾稼生。可見風雨之調和。原在人心之喜豫。蓋心和而氣和。氣和而陰陽交泰矣。王政本符乎情理。天心總寄于民心。信哉。

和帝永元五年。遣使分行三十餘郡。凡貧民之不能自食者。悉開倉賑給。

**謹案**和帝年十四五。能恤貧民。能除竇憲。亦云賢矣。第天性聰明。不如聖學日躋深邃。孰謂師保翼助之功。迂闊而不可近哉。

安帝時。皇太后鄧氏。每聞民飢。或達旦不寐。躬自減徹。以救災危。故雖有水旱交侵。宇內復寧。歲仍豐稔。是勤政之效也。

**謹案**民不賴君。何能活于凶歲。君不得民。何以享其太平。此君民一體之意也。假如手足有病。而心腹獨能舒泰乎。皇太后達旦不寐。以救饑民。世稱賢后。良有以也。桓帝永壽三年春。或上言。民之貧困。以貨雜錢薄。宜改鑄大錢。事下四府羣僚。及太學能言之士議之。太學生劉陶上議曰。當今之憂。不在于貨。在乎民飢。竊見比年以來。良



苗盡于蝗螟之口。杼軸空于公私之求。民所患者。豈謂錢貨之厚薄。銖兩之輕重哉。就使當今沙礫化爲南金。瓦石化爲和玉。使百姓渴無所飲。飢無所食。雖羲皇之純德。唐虞之文明。猶不能以保蕭牆之內也。蓋民可百年無貨。不可一朝有飢。故食爲至急也。

**謹案**古之帝王。每求直言。時開言路。民情得以上達。使閭閻疾苦。無時不昭揭于九重。是以政令所布。深愜民懷。惠澤所流。且周百世。而嘉謀嘉猷。并藉以垂光於千載耳。

**吳**孫權赤烏三年。民饑。詔遣使開倉廩賑貧者。

**謹案**國之賴民。猶魚之藉水。魚無水則不生。國無民則難與治。三國之主。強半稱雄。肯置其蒼生于溝壑哉。但遣使之中。又貴擇人。必得公平廉幹。精明寬厚之臣。而後可。蓋百萬生民之命。懸于一人之手。豈云細事。細閱其史。一無所貶。亦曰知人。

**北魏**高宗和平四年十月。以定相二州霽霜殺稼。免民田租。承明元年八月。以長安二蠶多死。免民賦之半。

**謹案**稼與蠶。小民養生之本也。苟於此而無所得。衣食



已虧。催科再急。不迫人于盜藪也鮮矣。今魏不特因霜害稼。而免其田租。且緣蠶息無收。而蠲其半賦。恩何溥也。仁哉斯制矣。

高祖太和二十年。以久旱。自癸未不食。至於乙酉。羣臣皆詣中書省請見。高祖在崇廬樓。遣舍人辭焉。且問來故。豫州刺史王肅對曰。今四郊雨已沾洽。獨京城微少。庶民未乏一餐。而陛下輟膳三日。臣下惶惶。無復情地。高祖使舍人應之曰。朕不食數日。猶無所感。比來中外貴賤。皆言四郊有雨。朕疑其欲相寬免。未必有實。方將遣使視之。果如

其言卽當進膳。如其不然。朕何以生爲。當以身爲萬民塞咎耳。是夕大雨。

**謹案**君心卽是天心。君能以萬民爲心。天未有不以一人爲念者也。民未饑而君已饑。天肯負愛民之君乎。此魏高祖輟膳三日而時雨降。可見感通之理。原在君心。君之愛民。正所以愛身。天之愛君。原欲其愛民。天也。君也。民也。分之則有三。合之則一體。理本相通。道無二致。敬天勤民者。所當三復斯旨。

城陽王徽爲并州刺史。先是州界夏霜。禾稼不熟。民庶逃



散安業者少。徽輒開倉賑之。文武共諫止。徽曰。昔汲長孺郡守爾。尚輒開倉賑救民災。況我皇家親近。受委大藩。豈可拘法而不救民困也。先給後表。孝明嘉之。加安北將軍。  
**謹案**皮之不存。毛將安附。備位大藩。而不知爲朝廷旬宣布化。子惠黎元。忝厥職也甚矣。觀安北將軍之明斷。先給後表。一轉移間。深合古名臣愛護百姓之至意。後之君子。可勿鑒諸。

**宋**文帝元嘉十二年。吳郡大水。錢唐升米三百。以揚州治中從事史沈演之兼散騎常侍。巡行拯恤。許以便宜從事。

演之開倉廩賑飢民。凡有生子者。口賜米一斗。刑獄有疑枉者。悉判遣之。百姓蒙賴。

**謹案**美哉元嘉之政。可見稱于天下後世者。蓋由飢饉之年。令臣便宜從事。無一人之不被其澤也。民當枵腹離散之際。誰不思邀惠于朝廷。以生其骨肉。倘巡行拯恤者。惠此而失彼。有始而無終。民受虛名。仍無實濟。何煩此使爲哉。演之得便宜之權。免掣肘之患。小者不遺于黃口。壯者可釋于囹圄。尚有淚如淫雨。並垂于空釜。鵲衣之上歟。古云上有便宜之令。下無專擅之臣。信哉。



此言也。

〔唐〕元宗開元十五年八月制曰。河北州縣水災尤甚。言念蒸民。何以自給。朕當寧興思有勞。旰昃在予之責。用軫于懷。宜令所司量支東都租米二十萬石賑給。二十二年十一月敕曰。百姓屢空。朕孰與足。言念于此。良所疚懷。又聞京畿及關輔有損田。百姓等屬頻年不稔。久乏糧儲。雖今歲薄收。未免辛苦。宜從蠲省。勿用虛弊。至如州縣不急之務。差科徭役。并積久欠負等。一切並停。其今年租八等已下。特宜放免。地稅受田一頃已下者。亦宜放免。

**謹案**開元之政大有可觀。卽此二詔。憂勤寬大之意。露于言表。此時也。宮廷肅穆。輔理承化者。多稱賢佐。是以有災卽得上聞。遇荒卽行補救。委曲詳盡。有實惠而無虛名。總之賤貨尊賢。去蔽去吝。四者古昔聖賢所爲。翼翼小心。守之而勿失者也。豈獨爲荒政云爾哉。實萬世致治之常道也。

郭子儀因河中軍士常苦乏食。乃自耕荒田百畝。將校以是爲差。於是士卒皆不勸而耕。是歲河中野無曠土。軍有餘糧。



謹案辛祐鎮襄陽墾田八百餘頃。祐之始至也。軍無隔日之糧。及至季年。有十年之積。汾陽之在河中。身體而力行之。上不致吾君憂國帑之無輸。下不苦吾民有助餉之拮据。一事舉而愛及于君民。非賢將而能若是乎。德宗賑給種子詔。春陽布和。萬物暢茂。實兆庶樂生之日。農夫致力之時。今茲吾人。則異於是。迫以荒饉。愁怨無憀。有離去井疆。業于庸保。有乞丐途路。困于死亡。鄉閭依然。烟火斷絕。種餉既乏。農耕不興。若東作僛期。西成何望。爲人父母。得不省憂。雖國計猶虛。公儲未贍。濟人之急。寧俟

盈豐磬其有無。庶拯艱厄。京兆府百姓並宜賜種子二萬石。同華州各賜三千石。陝虢兩州賜四千石。委州長吏卽與度支計會請受。差公清仁恤之吏。與縣令親至村間。隨便給付。仍加勸課。勿失農時。應諸倉所有遠年粟麥。宜令節度更分二萬石。京兆尹卽差官逐便搬載。賑賜貧人。先盡鰥寡孤惻。目下不濟者。務令均給。全活流庸。

**謹案**制云。東作愆時。西成何望。知此而有不錫之以種乎。於是流離者可以歸鄉。徬徨者可以止懼。窮民而無告者。可以生全。雖曰衰草荒田。不日而見青禾之盈目。



矣。

德宗時。諸州大水。陸贄請賑。帝曰。淮西缺賦。不宜賑。贄曰。寧人負我。無我負人。

**謹案**陸贄精白一心。忠誠愛國。凡所敷陳。總以布達君上。鴻恩體恤閭閻窮困爲主。所爲行益道以事君者也。故稱千古名臣之最。

憲宗元和間。南方旱飢。遣使賑恤將行。憲宗戒之曰。朕宮中用帛一疋。皆計其數。惟賑恤百姓。則不計所費。卿輩當體此意。

**謹案**憲宗儉于宮中而厚于百姓。且欲令羣臣悉體此意。仁哉聖心。抑何自奉廉而施恩溥也。從古奢靡之主。恩賞雖濫。而于百姓無關。由其內蔽于欲。而於兆庶始屯其膏耳。是故致治之道。先以清靜根本之地為主。文宗開成四年七月丙午。滄景節度使劉約奏請義倉粟賑遭水百姓。詔曰。本置義倉。只防水旱。先給後奏。敕有明文。劉約所奏。已爲遲晚。宜速賑恤。

**謹案**文宗實乃勵精求治之主。所以聞百姓之災傷。咎節度之不能先給耳。後之良有司。蓋深明乎救災拯患。



之不可少緩。所以干擅發廩之愆。不避同事之譏。一切爲已利身之想。毫忽不介于心。一朝出粟。億兆得生。其慈仁智勇。詎不足以昭示後人也耶。

**後周**太祖廣順三年春正月。或言營田有肥磽者。不若鬻之。可得錢數十萬緡。以資國用。周太祖曰。利在民。猶在國也。朕用此錢何爲。於是罷戶部營田務。除租牛課。

**謹案**惠在一時。名垂千載。于周太祖見之矣。彼時若鬻田與民。斂錢在國。國亦未必因是而強。而已非損上益下之誼。是故牧民者。貴知立國之本圖。而不必斤斤焉。

講求于功利則善矣。

世宗顯德五年遣使均定境內田租。世宗留心農事。常刻木爲農夫田器蠶婦等。置之殿廷。欲均田面租稅。先以元貞均田圖賜諸道。至是詔散騎常侍艾穎等三十四人分行諸州均定田租。

**謹案**世宗非五代之聖主耶。明達不下于唐太宗。愛養仿佛乎漢文帝。殿廷刻木而重農桑。諸道頒圖而均田賦。在上者知儲蓄之當先。得安不忘危之要道。在下者明耕耘之宜急。有未雨綢繆之至計。非仁政歟。



顯德六年。淮南饑。世宗令以米貸之。或曰。民貧恐不能償。世宗曰。民猶子也。安有子倒懸而父母不爲解者。安在其必償也。

**謹案**世宗以仁愛之心。發而爲矜民之語。大哉王言。被之當時。而恩意浹于人心。垂之簡冊。而仁政昭于後世。君民一體之理。深切而著明矣。願致治者。之日鑒在茲也。

**宋**太祖乾德元年四月。詔諸州長吏。視民田之旱甚者。蠲其租。不俟報。

〔宋〕董煟曰民之災傷至易曉也。今州縣或遇水旱兩次差官檢覆。使生民先被騷擾之苦。然後量減租數。幾不償所費矣。宜以乾德之詔爲法。

真宗咸平二年春閏三月。求直言。轉運副使朱台符上言。略曰。陛下踐祚以來。彗星一見。時雨再愆。彗星見者。兵之象也。時雨愆者。澤未流也。宜重農以積粟。簡卒以省費。專將帥之任以安邊。慎守令之選以惠民。捨此數事。雖有智者不能爲計矣。

〔謹案〕治天下者。果能以朱台符之言。而力行之。立見清



寧太平可奏。故爲政而得其要者。若烟微而火熾。冰渙而水通。無往而不得。民安物阜之盛也。

張詠知益州。以蜀地素狹。游手者衆。事寧之後。生齒日繁。稍遇水旱。民必艱食。時斗粟值錢二十六。乃按諸邑田稅。如其價。歲折米六萬斛。至春。籍城中細民。計口給券。俾如原價糴之。奏爲永制。其後七十餘年。雖有災饉。米甚貴而民無餒色。

**謹案**收穀粟代銀錢。至春仍依原價糴與窮民。此權宜通變之至計也。要其心無刻不以蒼生爲念。故能隨時

處置各適乎事勢之當然而民舉受其實惠耳。自詠守蜀而朝廷無西顧憂誠哉是言矣。

祥符六年秋七月知濱州呂夷簡請免稅河北農器。帝曰務穡勸農古之道也。豈獨河北哉。詔諸路並除之。

發明云。治國之道莫大于革弊政而恤民瘼。真宗禁內臣干預公事。除農器稅。皆治國之善政也。

仁宗天聖七年六月河北大水。壞澶州浮橋。七月命三司刑部郎中鍾離瑾爲河北安撫使。仍詔瑾所至發官廩以賑貧乏。其被溺之家見存三口者給錢二千。不及者半之。



溺死而不能收斂者。官爲瘞埋。其經水倉庫營壁。亟修完之。卑下者徙高阜處。水損官物。先爲給遺防監。亡失官馬者。更不加罪。止令根究。所部官吏貪暴不能存恤者。奏劾之。見繫獄囚。委長吏從輕決遣。其備邊事機。民間疾苦。悉具經畫以聞。

宋董煟曰。祖宗救災。非特旱傷禱祈蠲減而已。有水旱卒然而至。漂蕩民廬。浸濕官廩。其賑恤經營之方。尤爲詳悉。真可端拜爲矜式也。

仁宗慶曆元年十一月。以京師穀價踴貴。發廩二百萬石。

金匱要略卷之十一  
減價出糶以濟民

謹案減價出糶其法最善。在官無損。在民有益。但所發不多。如以杯水救車薪之火。又何益哉。今以百萬石濟之。不重米而重民。知米由民出。得反本還原之道。窮民得食歡呼。有不格上蒼而召和氣。致豐年哉。

仁宗每見天下有奏災傷州郡。必加存恤。嘉祐中。河北蝗澇。時霸州汶水縣。不依編敕告示。災傷百姓狀訴及本州。不以時差官檢視轉運以爲言。上曰。朝廷之政。寄於郡縣。郡縣之政。寄於守令。守宰之官。最爲親民。民無災傷。尚當



存恤。況有災傷而不爲受理。豈有心於恤民乎。自判官知縣司戶主簿。罰銅各有差等。上謂左右曰。所以必行罰者。欲使天下官吏。知朝廷恤民之意。

**謹案**昔人云。諒輔爲五官掾。大旱禱雨不獲。積薪自焚。火發而雨大至。戴封在西華亦然。古之良吏。爲民心切。竟至於此。今霸州諸吏。蠹國病民。惟銅是罰。當時朝廷雖寬其責。千載而下。議者孰肯恕其草菅民命之愆乎。文彥博在成都。米價騰貴。因就各城門相近之寺院。共十八處。減價糶米。仍不限其數。張榜通衢。翌日米價遂減。

金匱要略卷一  
謹案饑年富家藏米待價。故爾踴貴。今官米減價出糶。自不得不爭先出米而賤賣。然非循環糶糶。彼知官米有限。仍弗賤也。

吳遵路既俵米與民。又令採芻薪。出官錢收買。向常平倉糶米歸養老稚。計買柴共二十二萬束。比至嚴冬雨雪。市無柴薪。即依原價。令其買去發賣。官不傷財。民再獲利。

謹案出官錢收柴草。既不令彼苦于難賣。寒冬仍令販去。又得趁錢。一小事。而令民兩番獲利。非救荒之奇策而何。



齊州饑。河北流民。道齊境不絕。晁補之請粟于朝。得萬斛。爲流者給舍次。具器用。人旣集。則日給廩粥藥物。躬臨治之。凡活數千人。擇高原以葬無主者。男女異墟。使者頗妬其功。欲有以撓之。旣至境。按事。乃更歎服。

明陳龍正曰。男女異墟。禮行于亡魂矣。心之精微至此。此使者見而感服。蓋仁政之動人。有以化其偏私而發其天良也。

蘇耆。陝西轉運司。景祐中。洛陽大旱。穀貴。百姓飢殍。東京轉運司亦無以爲賑。洛陽留守移書求者粟二十萬斛。遂

移文陝府。如數與之。仍奏于朝。時同職謂耆曰。陝西沿邊之地。屯軍甚多。若有餘。止可移之以實邊郡。奈何移之別路。耆曰。天災流行。春秋有恤隣之義。生民皆繫于君。無內外之別。奈何知其垂亡。而不以竒贏賑恤耶。苟有饋運者。當自謀。必不以此相累。朝廷甚嘉之。

**謹案**民之竟日而不可無者食也。至數日則死矣。手握生民之權。坐視而不救。仁者當如是乎。蘇耆深明春秋之義。寧甘自罪。不累同僚。識力擔當。獨超千古。豈庸愚之有司所可及哉。



許元知丹陽縣。縣有練湖。決水一寸。爲漕渠一尺。故法盜決湖者。罪比殺人。會歲大旱。元請借湖水溉田。不待報。決之。州守遣吏按問。元曰。便民罪令可也。溉民田萬餘頃。歲乃大豐。

**謹案**民可救而恩未逮。心雖切而事不奮。雖有仁心而不繼以仁政。終未有以溥朝廷之德澤也。許尹決水溉田。寧甘自罪。有猷有爲。非良牧而何。

神宗熙寧七年夏四月大旱。帝語翰林承旨韓維曰。天久不雨。朕日夜焦勞。奈何。維對曰。陛下憂閔旱災。損膳避殿。

此乃舉行故事。恐不足以應天變。當痛自責已。廣求直言。因上疏。極言青苗及開邊之弊。會鄭俠繪所見爲圖。上之於帝。閱後竟夕不寢。遂慨然行之。詔出。人情大悅。是日果大雨。遠近沾洽。

**謹案** 昔范鎮云。水旱之作。由民生不足。憂愁無聊之歎。上薄天地之和耳。故新法一罷。民心悅而天道應。時雨立沛。凡君臨天下者。可不以民情而感通天意耶。

吳越大旱。時趙抃知越州。當民之未飢。爲書問屬縣。災所被者有幾鄉。當廩於官者有幾何。溝防興築。可僦民使治。



之者有幾所。庫錢倉米。可發者有幾許。富家可募出粟者有幾姓。僧道士所食之羨餘。書於籍者其幾有存。使各書以對而謹其備。時得粟四萬八千餘石。自十月朔。人日給粟一升。幼小者半之。憂其相蹂也。使男女異日受粟。人受兩日之糧。憂其流亡也。城市鄉村。立給粟之所。共五十七處。使各以便而受之。告富人無得閉糴。又出官米平價而糴。糴所共一十八鋪。使糴者便於受粟。給工食。大修城池。病者醫。死者埋。收棄兒。廩窮人。至五月而止。事有未便者。公一以自任。不以累其屬。有上請者。或便宜輒行。事無巨

金華先生集卷之十一  
三  
細。必躬親之。民賴以生。

舊評云。其施雖在於越中。其仁足以示天下。其事雖行於一時。其法足以傳後世。災沴之行。治世不能使之無。而能爲之備。民病而後圖之。與夫先事而爲之計者。則有間矣。不習而有爲。與夫素得之者。則有間矣。故采於越。得所施行。樂爲之識。

徐寧孫賑濟饑人。其策有三。第一策。本州縣當職官。盡實抄劄。果係孤老殘疾。并貧乏不能自食者。大人少兒。籍定姓名數目。將義倉米。逐鄉逐鎮。逐坊逐巷。分散賑濟。處處



請鄉官或士人各三人。如無上戶士人處。則請耆老忠厚者。置冊收支。給散關子。每五日一次。併而給之。大人日給一升。小兒減半。凡州縣市鎮鄉村。並令同日同時支散。以革重疊冒請之弊。乞丐等人。亦同日同時。別作一處支米。不得滾入饑民賑給。第二策。糶賣米麥。本濟窮民。奈有在市牙僧。與有力滑徒。令匪人假爲窮民。裝飾冒糶冒支。且又串同斛手。單賣與奸詭相知之輩。不及村落無食之民。卽有糶得窮民。已是將畢之際。強半糶穀糠粃。弊竇無窮。遂令本州縣立賞錢一百貫。令人舉首。務要及於鄉民。無

許冒濫其第三策賑濟當支散日用五色旗分爲五處每處分差指使二員吏二名抄劄饑民每一名給與牌子并小色旗候支散及數前來賑濟散了一旗再散一旗不許亂赴請所蓋事貴循序不得併在一處挨擠喧鬧

**謹案**此三策皆救荒之要則缺一不可不然饑民不得實惠者有之滑吏奸民而倍得者有之因賑給而擠踏至死者有之熟此則人事旣多克全何患天災之忽降也

元祐初河東京東淮南災傷監察御史上官均言賑恤有



五術。一曰施與得實。二曰移粟就民。三曰隨厚薄施散。四曰擇用官吏。五曰告諭免納夏秋二稅。上嘉納之。

**謹案**五事得行。民在堯湯之世矣。雖災而不受災之害。非蒼生之幸歟。不知蒼生之幸。卽國家之福。不可二視。蘇軾知杭州。時值大旱。饑疫并作。軾請於朝。蠲本路上供米三分之一。故米不翔貴。復得度僧牒百張。易米以救饑者。明年方春。卽減價糶常平米。民遂免大旱之苦。

**謹案**蘇軾之有益於杭也。最稱久遠。築堤引水。利濟民田。至今猶多賴之。蓋不獨救荒一事之請蠲減糶也。從

古名賢入則虔共爾位。曲體君心。出則利濟蒼生。爲國  
霖雨。固非僅恃文辭末技。鋪張揚厲。以干名譽已耳。繼  
軾而爲刺史者。其無務爲文章。以與軾相較優劣。然後  
可。

吳中大水。詔出米百萬斛。緡錢二十萬。賑救。諫官謂訴災  
者爲妄。乞加驗考。給事中范祖禹封還其章云。國家根本。  
仰給東南。今一方赤子。呼天赴愬。開口待哺。以脫朝夕之  
急。奏災雖少過實。正當畧而不問。若稍施懲譴。恐後無敢  
言者矣。



**謹案**知明處當然後可以論國家大體。祖禹賢臣也。洞悉民情。因申說奏災之不可罪。言簡而理勢盡。該正足以濟其封還奏章之力。

高宗紹興中。詔拯濟原爲貧民。近世拯濟止及城郭市井之內。而鄉村之遠者。未嘗及之。須令措置。州下縣。縣下鄉。雖幽僻去處。亦分委官屬。必躬必親。

**明**陳龍正曰。守令之賑城市。遺鄉村。豈非身在城市。據所見。忘所不見耶。夫窮民惟鄉村最多。以彼蠢愚無知。或生平畏見官長。忍餓不敢出。或事歸里正保長。任意

欽定四庫全書  
卷一百一十五  
三  
欺瞞。或保正胥吏勒索使費。強匿戶口。種種情弊。百出不窮。此處正宜盡心查察。可聽其遺漏。而一任窮民之無告哉。

孝宗淳熙九年七月。以江西常平義倉。及椿管米四十萬石。付諸司預備賑糶。出南庫錢三十萬緡。付浙東提舉朱熹。以備賑糶。詔發所儲和糶米百四十萬石。補淳熙八年賑濟之數。於沿江屯駐諸州椿管。九月。以錢引十萬緡。賜瀘州備賑糶。○十一年六月。詔諸州歲買稻種。備農之闕。

**謹案**

小民得分釐之惠。感激已殷。況在饑年。其欣幸也。



莫可言狀。又况賑糶賑濟行之不倦。更日有所得哉。故南渡之賢君。當推孝宗爲第一。

浙東大饑。命朱子提舉常平茶鹽。既拜命。卽移書他郡。廣募米商。蠲其稅。及至。客舟已輻輳矣。日與僚屬鈎訪民隱。至廢寢食。分書已定。案行所部。窮山長谷。靡所不到。拊問存恤。所活不可勝計。每出。皆乘單車。屏徒從。一身所需。皆自贍以行。毫不及州縣。以故所歷雖廣。而人不知。郡縣官吏。憚其風采。倉惶驚懼。常若使者壓其境。由是所部肅然。

◎朱子又嘗言於上曰。臣曾摹得蘇軾與林希書。謂熙寧

金匱要略卷之十一  
三  
中荒政之弊。費多而無益。以救遲故也。其言深切。可爲後來之鑒。

**謹案**愛民之政。身不力行。知之無益。行之不早。救之無益。所以朱子一聞上命。卽刻力行。招商訪困。不辭獨歷深山。以生餓殍。使州縣聞之。無不惶懼奉行。是一人之所活有限。而諸吏之救人無窮矣。非賢者而能之乎。朱子文章不可及。其政事乃如此。此其忠君愛民之心。曷常有須臾之間哉。

楊仲元調宛邱簿。民訴旱。守拒之。曰。邑未嘗旱。此狡吏導



民而然。仲元入白曰。野無青草。公曰。宴黃堂。宜不能知。但一出郊。可見矣。狡吏非他。實仲元也。竟得免稅。

**謹案**愛民之人。當此一邑流離之日。恨不能奮身以救。故見親民之官。惟以宴飲爲樂。而不計及民瘼。一腔慈悲之心。不得不激爲直戇之語矣。凡諸守令。所當廣厥聰明。不蔽于近。始可與言爲政之道。

**元**世祖至元二十年。詔停燕南河北山東租賦。

發明云。世祖因御史臺臣之言。詔停燕南等路租賦。一舉而聽言恤民之事。皆在其中。是亦可謂惠愛乎斯世。

斯民者矣。

至元二十二年。江西行省以歲課羨鈔四十七萬貫來獻。太子怒曰。朝廷但令汝等安百姓。百姓安。錢糧何患不足。百姓不安。錢糧雖多。能自奉乎。盡却之。

**謹案**帝王家能有一人以百姓爲念者。則四海盡受其福矣。况太子哉。羨餘之獻。皆民脂民膏。加派苛征而來者也。聚斂之臣。聞此言也。亦可以知所警矣。

至元二十七年。十月丁丑。尚書省臣言江陰寧國等路大水。民流移者四十五萬八千四百七十八戶。帝曰。此亦何



待上聞。當速賑之。凡出粟五十八萬二千八百八十九石。  
**謹案**急于救民者。有不待再計而決也。使稍有所吝。或  
令檢踏。或令移民。必有無限躊躇之事矣。總之惟明惟  
斷。乃能推實惠以予民。

成宗大德七年。詔比歲不登。賑飢乏。蠲差稅。貧積逋。近聞  
百姓困乏者尚衆。今內郡曾經賑濟人戶。其大德七年。差  
發稅糧。盡行蠲免。飢民流移他所。多方存恤。從便居住。如  
貧乏不能自給者。量與賑給口糧。被災處所。有好義之家。  
能出已財。周給貧乏者。其實以聞。量加旌用。

**謹案**不登之歲蠲賑之外窮黎賴富室以得生富民因濟困以榮身亦荒政權宜之一法也。

大德十一年江浙飢中書省臣言杭州一郡歲以造酒糜米二十八萬石禁之便。

**謹案**以必需之物置之可省之途者以米作酒是也無酒人不害無米人不生禁之便。

武宗至大二年詔被災曾經賑濟百姓至大二年腹裏江淮夏稅並行蠲免。至大二年正月以來民間逋欠差稅課程照勘並行蠲免。◎三年十月詔大都上都中都比之他



郡供給繁擾。與免至大三年秋稅。其餘去處。今歲被災人戶。曾經體復。依上蠲免。已徵者准下年數。

**謹案**蠲之爲言。惠民之政也。然亦貴及時。否則追呼早迫。杼軸已空。恩詔來自九重。而國課已納于百室。此際上有隆恩。下無實惠。中間吏胥。有私飽其囊橐而已。奉宣德意者。所當實心實力。剔弊釐奸爲要。

順帝至正十二年春正月。中書省臣言。今當春首耕作之時。宜委通曉農事官員。分道巡視。督勒守令。親詣鄉都。勸諭農民。依時播種。務要人盡其力。地盡其利。其有曾經水

旱盜賊等處。貧民不能自備牛種者。所在有司給之。仍令總兵官禁止屯駐軍馬踏踐田畝。以致農事廢弛。從之。

**謹案**蒼生愚賤。全恃朝廷之經綸以安。果如是之經理咸宜。施無不當。則民自享盈寧之福矣。撫民者所當條列其事而行之。庶無負司牧之責。

**明**太祖吳元年六月。不雨。上日減膳素食。羣臣請復膳。上曰。亢旱爲災。實吾不德所致。今雖得雨。然苗稼焦損必多。縱食奚能甘味。得乎民心。則得乎天心。今欲弭天災。但當謹于修己。誠于愛民。庶可答天之眷。下令免今年田租。



**謹案**太祖以蠲租爲寬民之力。以民心爲天心。是窮源而得本矣。尚肯困民而拂天平乎。有明數百年開國規模。最稱寬厚。于此亦可得其一二。

洪武初。陝西旱飢。漢中尤甚。鄉民多聚爲盜。莫能禁戢。是時府倉儲糧十萬餘石。知府費震卽日發倉。令民受粟。自是攘竊之盜。與隣境之民來歸者。令爲保伍。驗丁給之。賴以全活者甚衆。至秋大熟。民悉以粟還倉。上聞而嘉之。

**謹案**民之爲盜。多迫于無可如何耳。有司已得其情。自宜及早招來。予以自新之路。仍爲治世良民。但救之貴

金定月法金 卷一  
早遲則積惡多而不可屈國法以徇民。救之貴有權有力。否則適以餌盜。而奸民易肆其詐譎。此一等處置。非精明強幹。而又能保惠黎元者。皆不足以語此。

洪武二十六年二月上諭戶部曰。朕捐內帑之資。付天下者。民糴粟以儲之。正欲備荒歉。濟飢民也。若歲荒民飢。必候奏請。道途往返。動經數月。則民之飢死者多矣。爾戶部卽令天下有司。自今凡遇飢歲。則先發倉廩以貸民。然後奏聞。著爲令。

謹案飢民之待食。如烈火之焚身。救之者。刻不可緩。卽



以一日試之。亦無不驗。使必待往返而後發粟賑濟。生者尚可邀恩。死者焉能復活。太祖命先貸後聞。四字之中。仁心仁政。悉包羅無遺矣。

成祖永樂十年。敕戶部。朕爲天下主。所務在安民而已。近者河南民飢。有司不以聞。而往往有言穀豐者。若此欺罔。獲罪于天。此亦朕任匪人之過。其速令河南發粟賑民。凡郡縣及朝廷所遣官。目擊民艱。不言者。悉追下獄。○十一年正月。上謂通政司曰。朕令來朝有司。言民利病。率云田穀豐稔。比聞山西民。乃食樹皮草根。自今悉記之。境內災

金定長沙金卷一  
傷已不自言。他人言者必罪。

謹案守土之人。往往不肯以災傷報者。意欲處于賢人君子之列。以爲我能愛民。而天災不至。殊不知匿災不達。遲悞之愆正大。成祖深明其事。非睿哲之主乎。

永樂十八年十一月。皇太子過鄒縣。民大飢。競拾草實爲食。太子見之惻然。乃下馬入民舍。見男女衣皆百結。竈悉傾頽。歎曰。民隱不上聞。若此乎。顧中官賜之鈔。時山東布政石執中來迎。責之曰。爲民牧而視民窮如此。亦動念否乎。執中言災荒處。已經奏免秋糧。太子曰。民飢且死。尚及



徵稅耶。汝往督郡縣。速取勘飢民口數。近地約三日。遠地約五日。悉發官粟賑之。事不可緩。執中請人給三斗。太子曰。且與六斗。毋懼擅發。予見皇上當自奏也。至京果即奏之。上曰。昔范仲淹之子。猶能舉麥舟濟其父之故舊。況百姓皆朕之赤子哉。

**謹案**太子之過鄒也。始以民隱不上聞爲可歎。繼責執中身爲民牧。絕不動心爲可恨。三言飢民與死爲隣。猶語秋糧爲可笑。心切愛民。語皆循序。堯舜之仁。不過如此。後永樂復以麥舟爲喻。父子一心。善人是則。國祚之

永宜矣。

仁宗洪熙元年四月。時有至自南京者。上問道路所過何似。對曰。民多乏食。而有司徵糧如故。遂召問少師蹇義。所對亦然。上坐西角門。召大學士楊士奇等。令草詔。免稅糧之半。併罷官買。士奇對曰。當令戶工二部知之。上曰。救民之窘。當如拯溺救焚。慮國用不足者。多有不決之意。命中官具紙筆。令士奇等草詔于西角樓。遣使齎行。上顧士奇曰。今可語二部矣。左右或言地方千里。其間未必盡荒無收。亦宜別之。庶不濫恩。上曰。恤民寧過厚。爲天下主。寧與



民寸寸計較耶。

**謹案**仁宗此詔莫言蠲租卽此一番婉轉深心亦不易觀令人見之感德于數百年之後而況身逢其世乎。含宏廣大直與天地同符。

宣宗宣德九年正月巡撫周忱奏內有云臣將各府秋糧查其數內有北軍京職俸米一百萬石該運南京各衛上倉聽候支給計其船腳耗費每石須用六斗方得一石到倉臣嘗奏乞將前項俸米一百萬石于各府存收着令北京軍職家屬就來關支可省船腳耗米六十萬石又免小

民搬運之勞。荷蒙聖恩准行。遂得省剩耗米六十萬石。欲于蘇松常三府所屬縣分之。各設濟農倉一所。收貯前項耗米。後遇青黃不接。車水種田之時。人民缺食者。支給賑濟。奉旨准行。小民俱有賴焉。

**謹案**位鎮封疆。原非凡品。此時若不救濟蒼生。上紓君父之憂。以爲本固邦寧之計。豈不有辜屏翰撫綏之職乎。今奏減六十萬石以惠窮黎。大臣經濟。于此始稱無愧。

世宗嘉靖八年。山西大飢。叅政王尚綱上救荒八議。一曰。



愍飢饉。乞遣使行部。問民疾苦。二曰。恤暴露。乞有司祭瘞。消釋厲氣。三曰。救貧民。乞支散庾積。秋成補還。四曰。停徵斂。乞截留住徵。以俟豐年。五曰。信告令。乞勸分菽粟。六曰。推糴買。乞令無閉遏。七曰。謹預備。乞申舊例。措處積貯。勿使廩庾空虛。八曰。恤流亡。乞所過州縣。加意存恤。勿使羣聚思亂。戶部覆議行之。

**謹案**嘉靖繼統之後。連歲飢荒。其所以寧輯者。諸臣匡救之力耳。王叅政八議。與林僉事同在一時。誠皆一路之福星也。

嘉靖三十二年。程文德疏。水災異常。言官屢奏。持議未見歸一。臣謂今日內帑不必發。大臣不必往。夫救荒莫便于近。莫不便于拘。宜各遣行人。賫詔宣諭。令各州縣。自爲賑給。聽其便宜處置。凡官帑公廩。贖納勸借。苟可濟民。一不限制。又近日戶部申明開納事例。亦許就本地土納。卽粟麥黍菽。凡可救飢。皆得輸于倉庫。計值請劄受官。仍登計全活之數。定爲等則。以憑黜陟。卽撫按守巡賢否。亦以是稽之。制可。

**謹案**

時當儉歲。人肯以便宜請。則民之全活者多矣。何



也。救荒貴速而惡遲。文德所言。凡可以救民之飢者。皆得上納。是收涓滴之清流。而沛恩膏于涸轍矣。飢者不飢。流者不流。非若寒谷之回春歟。



野史云宋徽宗嘗言天下同春

野史云宋徽宗嘗言天下同春

野史云宋徽宗嘗言天下同春



